



PRIJEDLOG

Broj:
Maglaj,

Na osnovu člana 18. Statuta Općine Maglaj-prečišćen tekst („Službene novine Općine Maglaj“, broj: 8/07, 3/08 i 6/08.) i člana 26. Odluke o javnim priznanjima («Službene novine Općine Maglaj», broj: 4/15) na prijedlog Komisije Općinskog vijeća za dodjelu javnih priznanja, Općinsko vijeće Maglaj na sjednici održanoj dana 2021. godine, d o n o s i

ODLUKU
o dodjeli javnih priznanja Maglaj za 2021. godinu

Član 1.

Ovom Odlukom, a u skladu sa Odlukom o javnim priznanjima Maglaja dodjeljuju se javna priznanja Maglaja za 2021. godinu.

Član 2.

Javna priznanja dodjeljuju se slijedećim:

- | | |
|-------------------------------|--|
| 1. „Grb Maglaja“ | - JU „Dom zdravlja“ Maglaj |
| 2. „Zahvalnica Maglaja“ | - Humanitarna organizacija
Borderfree - Vanja Crnojević |
| 3. „Plaketa Maglaja“ | - NSoft kompanija |
| 4. „Maglajska lenta“ | - Izudin ef. Kruško posthumno i
Midhat Smajlagić |
| 5. „Počasni građanin Maglaja“ | - Ajša i Adem Mahmutagić |

Pisana obrazloženja za predložene kandidate za javna priznanja nalaze se u prilogu ove Odluke i njen su sastavni dio.

Član 3.

Javna priznanja iz člana 2. ove Odluke bit će uručena na svečanoj sjednici Općinskog vijeća u povodu Dana Maglaja – «18. septembra», a u skladu sa Odlukom Općinskog vijeća o javnim priznanjima Maglaja.

Član 4.

O dodijeljenim javnim priznanjima vodi se jedinstvena evidencija u Službi Općinskog načelnika i Općinskog vijeća.

Član 5.

Ova Odluka stupa na snagu danom objave u «Službenim novinama Općine Maglaj».

PREDSJEDAVAJUĆA
Svjetlana Zamboni- Radovanović

O b r a z l o ž e n j e

„Grb Maglaja“ je javno priznanje koje se u jednoj kalendarskoj godini može dodijeliti kao 1 (jedna) pojedinačna i 1 (jedna) kolektivna nagrada, ukupno 2 (dva) „Grba“.

„Grb Maglaja“ se dodjeljuje građanima Maglaja i drugim licima koja rade i djeluju na području općine Maglaj, privrednim društvima, ustanovama, udruženjima građana i drugim pravnim subjektima za doprinos u oslobođenju i odbrani Maglaja i izuzetne zasluge i postignute rezultate u teorijskom i praktičnom radu na unapređenju nauke, privrede, obrazovanja, kulture, umjetnosti, sporta, zdravstva, socijalne brige i dječje zaštite, unapređenje i afirmaciju tolerancije, kulture dijaloga, zaštiti i afirmaciji ljudskih prava i sloboda garantovanih međunarodnim konvencijama, Ustavom i zakonima, kao i spašavanje ljudi, imovine, unapređenje demokratije i suživota.

„Grb Maglaja“ istom licu ili instituciji može se dodijeliti samo jedanput.

„Grb Maglaja“ JU „Dom zdravlja“ Maglaj

JU Dom zdravlja Maglaj pored svog redovnog i uspješnog rada sa pacijentima, maksimalan napor uložila je tokom pandemije u 2020. godini. U tom periodu svi su radili na tome da se sačuvaju građani od COVID-19, te su upotrebljeni svi mogući resursi, kako ljudski, tako i svaki drugi da se što veći broj osoba zaštiti, testira i oporavi od virusa. Neprekidan, svakodnevni rad medicinskih radnika, direktora i administracije rezultiralo je činjenicom da se Maglaj zaista, u odnosu na druge općine sačuvao, održao i izborio protiv COVID-19. Također, u tom periodu kada niko nije znao s čime se suočava, Dom zdravlja je svojim stručnim kadrom otkrivao zaražene pacijente, testirao i na taj način pravovremeno reagovao i spašavao živote građana. Zajedničkim snagama u saradnji sa PS Maglaj, Crvenim križom Maglaj i Općinom Maglaj radili su između ostalog na provedbi mjera koje su na snazi, sprečavanju širenja koronavirusa, kao i smanjenju broja kontakata. U svom redovnom radu, stručne edukacije zdravstvenih radnika i specijalizacije ljekara koje ova ustanova pruža stvaraju dodatne mogućnosti za unapređenje kako same ustanove, tako i zdravlja pacijenata. Pravovremenim načinom djelovanja, izlagajući svoje živote i porodice, borili su se nemilosrdno da sačuvaju svakog zaraženog, pruže neophodnu njegu i bez prestanka lavovski štite svakog pacijenta.

Zahvalnica“ se dodjeljuje kao znak zahvalnosti i odavanje priznanja za konkretan uspjeh i poduhvat neprofitnim ustanovama i organizacijama i udruženjima građana (škole, sportska i druga udruženja građana).

Zahvalnica“ se dodjeljuje u vidu diplome uz novčani iznos čiju visinu utvrđuje Općinsko vijeće, a koja ne može biti niža od 1.000,00 KM (jednu hiljadu konvertibilnih maraka).

„Zahvalnica“ Humanitarna organizacija Borderfree (Vanja Crnojević)

Humanitarnu organizaciju Borderfree osnovala je Maglajka Vanja Crnojević koja se odlučila pomoći Maglaju u vrijeme pandemije koja je zahvatila cijeli svijet. Odlučila se na pomoć u vezi sa infrastrukturom, posebno u selima oko Maglaja. Uložena su sredstva u podizanje potpornog zida u maglajskom selu Tujnica, pošto se tu nalazi rijeka koja nosi cestu tako da predstavlja opasnost za domove i ljude. Također su u saradnji sa Općinom Maglaj i načelnikom općine Mirsadom Mahmutagićem pokrenuli izgradnju mosta u maglajskom selu Novi Šeher. Organizacija je obišla i nekoliko maglajskih porodica koje žive u teškim uvjetima. Također, Maglaju je poklonila drvenu kućicu za prodaju suvenira. Nisu rijetke ni nagrade koje je dobijala Vanja Crnojević i ova humanitarna organizacija.

„Plaketa Maglaja“ dodjeljuje se poduzetnicima i privrednim društvima za vidljiv doprinos u privrednom napretku općine Maglaj u protekloj godini.

Istim kolektivima ili pojedincima „Plaketa Maglaja“ može biti dodijeljena jedanput u 5 (pet) godina.

**„Plaketa Maglaja“
NSoft kompanija**

NSoft, informatička kompanija iz Mostara u augustu prošle godine je svoj ured nakon Zagreba otvorila i u Maglaju i zaposlila pet programera. Već tada su iskazane velike ambicije u pogledu zapošljavanja. Sve je započelo 2019.godine kada su predstavnici NSofta prvi put prisustvovali 6.IT Challenge kojeg je organizovala maglajska Gimnazija i koji važi za nezvanično državno informatičko takmičenje srednjoškolaca iz cijele zemlje. Saradnja je nastavljena otvaranjem SPARK School IT Hub Maglaj by SPARK, a koja je okupljala buduće programere iz Maglaja, Žepča, Zavidovića, Tešnja, Doboja, Gračanice i Teslića koji su učestvovali na besplatnim, početnim i naprednim radionicama programiranja. Već tada je, uz veliku podršku lokalnih vlasti, najavljeno otvaranje ureda u Maglaju za 2020.godinu. A onda se desila pandemija koronavirusa. Međutim, NSoftverne ni pandemija nije spriječila da provedu planirano u djelo, pa je tako u augustu prošle godine otvoren ured u Maglaju. NSoft nudi vlastita, softverska rješenja za industriju zabave, ali razvija aplikacije i sisteme iz domena sigurnosti, kao što je primjerice NSoft Vision, što je zapravo nadogradnja postojećih sigurnosnih sistema. NSoft želi na razne načine pomoći lokalnoj zajednici i već je ponuđena određena pomoć u digitalizaciji.

„Maglajska lenta“ dodjeljuje se pojedincima koji su kroz svoj životni vijek svojim radom i djelovanjem ostavili vidljiv i prepoznatljiv trag i postali prepoznatljivi građani lokalne zajednice. Istim pojedincima „Maglajska lenta“ se može dodijeliti samo jednom.

**«Maglajska lenta»
Posthumno
Izudin ef. Kruško**

Izudin efendija Kruško bio je šef Odjela za opšte poslove i podršku u Upravi za pravne i administrativne poslove, a duže vrijeme je bio glavni imam Medžlisa IZ Maglaj kada su obnovljene džamije i sagrađena nova gradska džamija s dvije munare. Posebno priznanje mu je dato nakon poplava 2014. godine kada je pored obnove poplavljenih vjerskih objekata organizirao pomoć i Domu zdravlja u Maglaju. Za vrijeme svog imamskog angažmana organizirao je brojne donacije za socijalno ugrožene porodice i popravku njihovih kuća, uvezujući džemate i donatore iz dijaspora sa džematlijama u Maglaju. U Maglaj je stigao u maju 1994. godine u pratnji tadašnjeg vrhovnog poglavara IZ u BiH dr. Mustafe ef. Cerića, koji mu je povjerio zadatak da u vrijeme borbe za vjeru, čast i slobodu domovine bude predvodnik Bošnjaka u džematima Medžlisa Maglaj. Ohrabrivao je zatim povratak, a sa prvim povratnicima u MZ Kopice 1996. godine, kada je to bilo gotovo nevjerovatno, spavao je u njihovim uništenim i popaljenim kućama. Sa nevjerovatnim entuzijazmom Izudin ef. Kruško je radio na obnovi uništenih vjerskih objekata i izgradnji novih. Dao je ogroman doprinos u razvoju vjerskog, kulturnog i humanitarnog života Maglaja.

**«Maglajska lenta»
Midhat Smajlagić**

Midhat Smajlagić, Maglajlija, čitav svoj život posvetio je fudbalu. Bivši je igrač NK „Natron“ Maglaj, kao i FK „Sloboda“ Tuzla. Bio je jedan od najboljih igrača tuzlanske Slobode gdje je proveo četiri godine i odigrao preko 120 utakmica. Sa ovim fudbalskim klubom bio je dio Olimpijske reprezentacije Jugoslavije. Kada se prestao aktivno baviti ovim sportom, nastavio se boriti da svoje znanje prenosi na mlađe generacije, te sudjeluje u razvoju sporta na području općine Maglaj.

Počasnim građaninom Maglaja može se proglasiti lice posebno zaslužno za afirmaciju vrijednosti demokratskog društva, historijskih događaja i tradicija Bosne i Hercegovine, položaja i ugleda Maglaja i njegovih odnosa sa drugim gradovima i općinama u zemlji i inostranstvu, te razvoj Maglaja ili pojedinih djelatnosti, državnik ili službenik druge države, član međunarodne organizacije odnosno organizacije druge države posebno zaslužan za Maglaj i Bosnu i Hercegovinu u jačanju njihovog ugleda na opće prihvaćenim načelima savremenog svijeta.

**„Počasni građanin Maglaja“
Ajša i Adem Mahmutagić**

Ljubav prema djeci, a posebno djeci ometenoj u razvoju, spojila je životne i profesionalne puteve učitelja u područnim školama Tujnici i Ljubatoviću, Ajšu Berbić i Adema Mahmutagića. To je bila želja i motiv za Ademovim daljim stručnim usavršavanjem, što je rezultiralo diplomiranjem na Višoj defektološkoj školi u Beogradu 1967.godine i Ajšinim 1971.godine. Ubrzo nakon toga uslijedio je nastavak studija na Fakultetu za edukaciju i rehabilitaciju u Zagrebu i sticanjem zvanja profesora defektologa 1975.godine. Zbog ukazane potrebe osnivanja specijalne osnovne škole, profesionalni put ih vodi u Tuzlu. Osnivanje Fakulteta defektologije u Tuzli, također je vezano za imena Ajše i Adema Mahmutagića, koji su uz nekolicinu kolega iz Tuzle i Beograda, podržali inicijativu i pomogli u osnivanju fakulteta. Potreba za stalnim stručnim usavršavanjem i razvoj defektološke teorije i prakse u oblasti specijalnog inkluzivnog odgoja i obrazovanja ovaj bračni par nastavlja svoju edukaciju što rezultira sticanjem zvanja magistra 1998.godine, a potom i zvanja doktora 2002.godine. Dobitnici su brojnih priznanja za svoj stručni i naučni rad. U okviru rada na Fakultetu, pored izvođenja nastave, obavljali su i druge odgovorne funkcije kao prodekani za nastavu, a Ajša i kao šef Katedre. Treba istaći da je uz brojna priznanja stručnim organizacija na državnom i lokalnom nivou Ajša dobitnica Oktobarske spomen plakete grada Tuzle i Ordena rada sa srebrenim vijencem. Uz bogat opus naučnih i stručnih radova iza sebe je ostavila prepoznatljiv trag i na državnom nivou, te afirmirani ustanovu Centar za djecu sa višestrukim smetnjama „Koraci nade“ čiji je bila idejni tvorac i dugogodišnji koordinator. Svoj profesionalni angažman u koji su utkali svu svoju ljubav i energiju završili su Adem nakon 40 godina, a Ajša zbog potreba Fakulteta nakon 42 godine rada. Odmah po penzionisanju odlaze za Ameriku da bi uživali u društvu svojih sinova i unuka. Nikada nisu zaboravili svoje učenike, njihove roditelje, studente i saradnike sa kojima su i danas u kontaktu. Ništa manje značajna nije i ljubav prema Bosni i Hercegovini i Maglaju, zbog čega ih možete vidjeti svakog ljeta na ulicama rodnog grada. Ove godine su proslavili 55 godina sretnog i uspješnog braka.

Spisak svih dostavljenih prijedloga za dodjelu javnih priznanja za 2021.godinu.

Na raspisani javni oglas dostavljeno je 8 (osam) koverata sa prijedlozima kako slijedi:

1. Sabahudin Hasanić predložio – Hajrudina Bećirovića Bijelog – Grb Maglaja posthumno;
2. Grupa građana grada Maglaja: Dr. Emira Drnda-Čičeklić, Jasmin Devedžić, Fuad Čičkušić, Šefka Hasanić, Emina Isić, Armina Agić, Emira Krupić, Nedžad Ahmetbegović i Armina Mustabašić predložili su- Dr. Edin Begić – Počasni građanin;
3. Dr. sci. Mirsad Hasanić predložio je- Izudin ef. Kruško- Maglajska lenta posthumno;
4. Grupa građana Maglaja predlažu- Adema Mehinagića – Grb Maglaja;
5. MZ Kosova predložila- Suljo Mešić-Grb Maglaja/ Maglajska lenta;
6. OO SDP Maglaj predložili:
 - Ajša i Adem Mahmutagić- Počasni građanin Maglaja/ Grb Maglaja
 - Midhat Smajlagić- Grb Maglaja/Maglajska lenta
 - Izudin ef. Kruško- Maglajska lenta posthumno;
7. Načelnik općine Mirsad Mahmutagić predložio:
 - NSoft kompanija- Plaketa Maglaja
 - JU Dom zdravlja Maglaj – Grb Maglaja/ Plaketa Maglaja/ Zahvalnica Maglaja
 - Humanitarna organizacija Borderfree- Vanja Crnojević – Grb Maglaja / Zahvalnica Maglaja
 - Ramiz Kadrić- Počasni građanin Maglaja;
8. Grupa građana MZ Kopicice predložili- Senajida Husića- Grb Maglaja;

Obradivač

Emina Hasanić, Stručni savjetnik za poslove Općinskog načelnika i Općinskog vijeća

